

Gap Year galak belia jadi sukarelawan



IDRIS JUSOH (tiga dari kiri) menyampaikan Anugerah Pingat Tunku 2016 kepada James Lian Yoon Chen (tiga dari kanan) di Memorial Tunku Abdul Rahman, Kuala Lumpur, baru-baru ini.

KEMENTERIAN Pendidikan Tinggi memperkenal program *Gap Year* bagi menggalakkan lebih ramai golongan belia melibatkan diri dalam aktiviti kesukarelawan, sekali gus dapat membentuk generasi yang mengambil peduli keperluan dan kebajikan masyarakat.

Menterinya, **Datuk Seri Idris Jusoh** berkata, menerusi program tersebut, mahasiswa dibenarkan melakukan aktiviti-aktiviti kesukarelawan, pekerjaan dan pengembalaan selama setahun sepanjang tempoh pengajian.

Menurutnya, program yang dijangka diperkenal di seluruh universiti tempatan pada pertengahan tahun ini

adalah berdasarkan pilihan atau minat masing-masing dan tidak diwajibkan.

“Kementerian membuka peluang ini sebagai usaha memupuk budaya kesukarelawan dalam kalangan penuntut universiti.

“Kementerian juga ingin melahirkan rakyat Malaysia yang memiliki sifat kasih sayang dan sanggup berkhidmat demi negara dengan ikhlas,” katanya.

Beliau berucap dalam majlis penyampaian Anugerah Pingat Tunku 2016 di Memorial Tunku Abdul Rahman di sini hari ini.

Dalam majlis itu, pelajar Universiti Sains Malaysia (USM), Lian Yoon Chen dipilih sebagai penerima pingat emas Anugerah Pingat Tunku 2016.

Yoon Chen, 24, yang bakal bergelar doktor gigi menerima hadiah RM5,000 dan emas seberat 32 gram (gm).

Bekas mahasiswa Universiti Sains Islam Malaysia (USIM), Hanisah Hassan diumumkan pemenang pingat perak manakala pingat gangsa, Muhamad Khairul Adib Muhammad Yusof dari Universiti Putra Malaysia (UPM).

Hanisah, 25, dan Muhamad Khairul Adib, 22, masing-masing membawa pulang emas seberat 32 gm dan RM3,000 serta RM1,000.

Dalam majlis itu juga, Idris menyampaikan Biasiswa Khas Yayasan Tunku Abdul Rahman kepada 25 pelajar daripada keluarga berpendapatan rendah.